

光緒山西通志

鄉賢錄十六

錄二之十六

山西通志弟百三十一

賈進士出身頭品頂戴兵部侍郎兼都察院右副都御史巡撫山西提督軍務張勳奉旨監修

明

萬曆至崇禎

馬朝陽太原人萬曆丁丑進士累官四川兵巡道征楊應龍有功請告歸閉門課子外事盡卻巡方喬允升嘗求一面終不允後卒妻程氏守節幾四十年

萬自約太原右衛人萬曆庚辰進士授唐縣知縣爬搜悍黠舊俗一變擢刑科給事中改戶科前後劾罷兩尚書兩都御史一翰林學士出爲陝西漢中僉事潔已率屬罷諸不切務居二年遷尚寶司少卿再遷光祿寺適倭犯朝鮮主兵事者謀以封貢款之抗疏力爭遷南京太僕寺卿尋以原官召還

修舉馬政厯太常寺卿順天府尹時大內方索珍寶自約悉與停罷坐是解組歸

李成名字實知太原衛人萬厯戊辰進士授中書舍人推禮科給事中疏陳銓政失平語侵尙書趙煥俄請釋縲臣滿朝薦言朝薦不釋則諸璫日肆國家患無已荆養喬訐南畿提學熊廷弼力主行勘吏部侍郎方從哲中旨起官抗疏劾之并及其子恣橫狀尋移疾歸後起山東副使天啟初遷湖廣參政入爲太僕少卿四年春擢右僉都御史巡撫南贛崇禎初召拜戶部右侍郎轉左專理邊餉改兵部召對平臺區畫兵事甚悉數月而罷卒於家

鄭宗周字伯忱文水人父之僑工部虞衡司主事宗周幼英敏讀書西山甘泉寺萬厯丁未成進士授鉅鹿知縣調唐山

擢監察御史列首輔方從哲奸狀光廟崩累疏請正李可灼
崔文昇罪與楊左並稱忠鯁出按福建首正朱李忠定公祀
典廉墨吏寘於法時閣黨薰灼惡宗周異已竄名紅丸案內
將中傷之會遇外艱不果莊烈帝立起掌河南道遷太僕寺
少卿發戶兵二部匿情遼薊諸鎮宿弊前後疏四十餘上首
正卿擢兵部右侍郎巡撫天津遼東失守民相率徙內地加
意撫輯尋遇內艱奔歸終制不復出宗周貌清癯若不勝衣
遇義可否挺特不少屈當父病留心醫藥遂精岐黃家言嘗
手刪本草一書行於世

王在臺字爾基文水人萬曆癸丑進士授滕縣知縣值洊饑
設法振貸福藩內侍求昭陽湖田爲贈田力與抗拒得免入
爲戶部主事遷郎中督通倉再督延儲璫禍作告歸家居四

年補原官遷知漢中府政先教化有文翁遺風獨嚴治瑞藩
監尉之奪民田者遷布政司參政分守關南時流寇掠興安
募兵固守先是在漢中勦賊常板子等俱有功至是名益著
廷推鄖陽巡撫以病未任歸卒

尹同皋字舜鄰興縣人知縣就湯子萬歷癸丑進士授密雲
知縣振饑蠲逋擢兵科給事中改工刑戶三科給事中前後
疏七十餘上而錢糧京察屯田保甲諸疏議尤中時弊遷太
常寺少卿後歷僉都御史巡撫四川削平奢崇明之亂加兵
部右侍郎致仕歸遭親喪廬墓六年推愛宗族拯危濟急有
范文正之遺風著有畏天齋實蹟撫蜀須知諸書行世

張養字惟直榆次人父九河爲汜水令以善政聞養登萬歷
丙辰進士授中書舍人主考山東所取皆知名士拜御史論

劾不避權貴巡視淮揚鹽政潔已通商極力振刷清出浮課二十餘萬貯公帑奸人側目誣以公費爲私囊下刑部獄禁錮八年後歸里卒著有四書主意禮經獨解禮記纂言等書子天保有孝行舉進士官吏部考功郎

高登明字公野翼城人萬厯壬午舉人知城固縣初修渠堰造土恤勞人蒙其惠再任同知持法平允不設什排不遺一隸而賦完訟清民皆樂業三年升保定府同知

張光宇字懷谷太平人父鵬程舉人知成縣光宇舉萬厯乙酉鄉試授漢中府同知職清軍水利凡六載伍充田沃課上績一督尙衣兩攝郡篆再署州縣所至政簡刑清民安盜息升廣南知府會武定兵變悉平之調廣西府東有潯源向以山隔無水利爲設法鑿通歲溉千頃成膏腴民稱張公壩又

設學田勤課士正風俗嚴保甲招攜服遠爲粵牧最升山東
鹽運使致仕歸講經史開來學卒之日遠近流涕思慕焉

楊天民字正甫太平人萬曆十七年進士除朝城知縣調繁
諸城有異政擢禮科給事中時纂修國史請復建文年號從
之二十七年狄道山崩下城池山南湧大小山五上言平地
成山惟唐垂拱間有之而唐遂易爲周今虎狼之使吞噬無
窮狗鼠之羣攘歛難厭不市而征稅無礦而輸銀甚且毀廬
發冢籍人貲產非法行刑自大吏至守令每被譴逐郡邑不
肖者反助虐交歡藉潤私橐故天心仁受亟示譴告陛下當
不覺悟翻然與天下更始哉不報文選郎中梅守峻貪黷天
民劾罷之再疏論延綬失律奪巡撫王見賓職總兵官超夢
麟戍邊總督李汝亦被譴進右給事中冊立久稽再疏請不

報鄭國泰疏請先冠婚後冊立天民力斥其非順天湖廣鄉
試文多用二氏語天民請罪考官疏留中二十九年五月復
上言請早立國本帝大怒請天民貴州永從興史九年上迫
廷議始立東宮而天民卒不召陷憤卒天啟中贈光祿少卿
初天民去諸城民爲立祠其後長吏不職父老率聚哭祠下
張國光字賓吾曲沃人萬厯辛卯舉人授屏山縣知縣均賦
役清驛遞殲積年之寇佐餉運之窮卓有成績丁艱補夏邑
有政聲升戶部主事轉員外郎

史學遷異域人家貧嗜學嘗徒步百里外學春秋於先達者
既成登萬厯壬辰進士知直隸威縣以寬勝調滑縣以嚴勝
因地異政時論稱其不偏擢監察御史屢按直省所至以伉
直著指陳闕失劾封疆大吏多蒙諭允常薦常熟知縣楊漣

保定推官張銓後俱忠烈有名歸里後以異俗冠婚喪祭多不遵古法編四禮圖一冊刊布之又出數千金修煤徑建嶺下橋著有四書心言麟經三易草行於世

李瑾字仲魯襄陵人萬曆乙未進士授正定知縣性廉明不徇請謁入爲禮部主事選工科給事典浙江鄉試有知人鑑遷吏科給事中條陳參駁胥闕朝廷大體有三垣奏疏集行世歷太常寺卿擢都察院右僉都御史巡撫順天察吏安民實兵足餉事事具有長策晉兵部左侍郎署尙書事時魏璫用事求蔭其弟姪瑾以國家異數所以待有功堅持不予後屢疏請告魏璫嫌前事矯旨削璫誅有詔數起用卒不赴然不以退居忘國事捐粟振饑力禦寇難以靈石爲平陽要地改隸汾州險阻俱失特疏請復卒贈尙書賜祭葬恩蔭

有加

高邦佐字以道襄陵人萬曆二十三年進士授壽光知縣教民墾荒招集流亡三千家厯戶部主事員外郎稍遷永平知府潞澤河築長隄裁抑稅使高淮不敢大橫遷天津兵備副使平巨盜蓮時耀轉神木參政屢破套部沙計憂歸補薊州道坐調兵忤主者意被劾歸天啟元年起參政分守廣甯以母年八十餘涕泣不忍去母責以大義乃行累乞歸方報允而巡撫遞衆謂邦佐既請告可入關邦佐叱曰吾一日未去則一日封疆臣也將安之夜作書訣母策騎趨右屯官吏並潰邦佐仰天長歎泣語從者曰事去矣吾守地當死此汝歸報太夫人遂西向拜闕復拜母解印綬自經官舍僕高永曰主人死安可無從者亦自經於側賜祭葬贈光祿卿再贈太

僕卿諡忠節世蔭錦衣百戶邦佐與張銓何廷魁皆山西人
詔建祠宣武門外顏曰三忠

張雲翼字伯襄太平人萬曆戊戌進士授行人司行人轉南
戶部主事歷員外郎中度支惟明出爲鞏昌知府潔已率屬
杜苞苴明折獄革贖錢政餘集諸生課文講藝凡五載隴右
人文蔚興羣民肖像以祀轉長蘆運使時創議包鹽課執不
許赴上臺以去就爭用是羣商鼓勵歲預輸金錢十萬餘升
雲南參政土人木車兒與八屯西尾叛密授方略於劉長祚
討之旋執俘又平獠亂躬環甲冑至廢寢食得保甯諡雲翼
生平純孝孺慕終身篤友誼矧貧乏行多義舉窮通一致其
天性然也

翟師雍字如臨襄陵人萬曆辛丑進士授行人擢戶部主事

升大名知府捐俸置田以惠寒士歷陞陳道副使遷山東參政督理七省漕務著有飭漕末議升湖廣右布政尋轉左副陝西關內道勦寇有功值里居遭岡變死弟師偃癸卯舉人初授教諭歷官刑部員外郎以忤魏璫被削奪崇禎初賜還弟師有己酉舉人初署通州學正改知范縣賦性鯁直時稱彊項歸里後敦族修譜耽好圖史弟兄三人相繼登科時有河東三鳳之譽

喬君章臨汾人萬厯間以貢主簿蒲城清慎有守折獄明允華州失守蒲人震駭君章慷慨任城守責防禦甚悉寇知有備歛衆去攝渭南簿設法運漕官民兩便新簿來去任百姓遮留至二日不得發將渡渭羣起斷其輜傷御者手甫渡蒲人譟擁以歸渭人亦流連望之不卽去後御者傷重將死家

人環向哭其人徐開目曰但得喬公復還吾卽死無恨其得人心如此

鄭崇儉字大章鄉甯人

明史誤甯鄉

萬曆四十四年進士授河南

推官有政聲歷濟南兵備副使廉正不擾遠近頌之崇禎三年遷陝西右參政屢遷右僉都御史巡撫甯夏數敗套部賚銀幣世蔭錦衣千戶十二年正月擢兵部右侍郎總督陝西三邊軍務五月總理熊文燦請敕崇儉提兵合擊張獻忠羅汝才崇儉以將帥胥入衛急請曹變蛟還鎮不許徵柴時華及延甯二鎮兵又不至發西安士馬單弱副將李國奇至洛陽卒大譟坐貶一秩獻忠謀入陝崇儉督國奇及賀人龍扼之興安賊乃轉入興安坪處秦蜀交先是尙書傅宗龍議令崇儉兼督蜀軍而督師楊嗣昌亦檄秦軍入蜀崇儉乃以十

三年二月率人龍國奇兵直抵瑪瑙山與左良玉會初七日
兩軍夾擊賊大敗崇儉軍獲首功千三百降賊將三十五人
獲馬羸甲仗無算論功半嗣昌但增一秩復先所降一秩而
已獻忠竄河家坪蜀將張令追之被圍崇儉急遣兵走賊復
督人龍國奇及高傑等追敗之寒溪寺鹽井先後斬首千五
百級其黨順天王一條龍一隻龍首降崇儉軍五日三捷威
名甚振以年衰乞骸骨不許令還關中留人龍國奇討賊及
人龍軍大譟歸嗣昌因言崇儉撤兵太早致賊猖獗命削籍
候代明年春襄陽陷上益恨崇儉不犄角平賊逮下獄責以
縱兵擅還失悞軍律以五月遇害後給事中李清言崇儉未
失一城喪一旅因他人巧卸遂服上刑羣臣微知其冤無敢
爲訟言者臣甚痛之崇儉冤始白

王國瑚字夏器猗氏人萬曆壬辰進士初授行人歷戶部主
事督明智廠積羨草五萬餘督中南倉積羨米四萬餘悉報
部堂大司農刊榜爲後官式升延安知府重恤民艱嚴禁苞
苴諸屬肅然滌慮以延城逼近西陲無井日用率汲外河嘆
曰若遇警嬰城有坐困耳乃謀穿井得甘井二十餘處辛酉
秋吉囊擁部落十餘萬入安塞口直薄郡城環攻七晝夜埤
上矢石雨下復出奇殲壯級十八顆敵知有備殺鄉導投款
書三紙遞出榆林總兵杜文煥提師覩望撫軍以解圍之功
歸杜報捷國瑚守土斬獲匿不問尋遷肅州兵道投牒大部
乞以病免御史練國事特疏薦之謂國瑚功在社稷宜膺不
次冢宰張問達題敘前勞擢光祿寺少卿癸亥詣闕值魏璫
竊乘引退遂削籍崇禎元年凡璫奪秩均蒙環召卒引禮不

出講學著書自娛子春貞字元復幼有奇慧登丁未進士以
行人奉使楚肅二藩有常餽悉卻之曰吾安可初筮仕卽黷
官常乎孝友樂易出於天性年甫壯以疾卒人咸悼惜國珞
三世進士皆初任行人當世榮之

荊州土字厚齋臨晉人萬厯丁丑進士授臨朐知縣臨朐濱
海邑地瘠民貧兼值凶荒既至捐俸立官莊具牛種平賦輕
刑五年邑大治擢御史正言讜論持大體亦不專以鷹擊爲
能出督漕政按蘇松再按順天遷大理丞轉左右少卿特簡
右僉都御史巡撫河南時兩河北歲災沴甫受命卽疏請寬
賦役撫流移行部至汜水疾作聞朝廷遣內官開礦境內伏
枕具疏未及上而卒州土長身豐下形如山岳坐立不敬步
履進退具有矩則與人言春容詳雅和氣可拘遇是非利害

挺然特立人謂和而能栗云子養喬進士應喬舉人孫祚永
爾植進士服官胥有聲

荊州俊字章甫猗氏人教授琨孫也萬曆癸未進士知陝西
長安縣擢監察御史執政某以子爲同年生欲引以自重謝
去不顧嘗抗疏請止貢金花又糾諸貂璫奸貪不法狀出爲
山東參議值蝗災力請蠲賦與撫軍忤謝病歸尋起甯夏臨
鞏副使套騎大入督將士禦之血戰甚力轉皋蘭整飭道酋
長賓免父子據松山爲亂出兵搗其巢大小十七戰皆奏捷
加左布政使艱歸起莊浪監軍道未任擢甘肅巡撫入爲刑
部侍郎卒謚正襄祭葬如懿典弟州士副榜貢教諭長治捐
俸代倉吏王俊輸逋糧俊請以女侍拒不納後中已卯舉人

官東平知州

韓爌字象雲蒲州人萬曆二十年進士授庶吉士進編修歷
官少詹事充東宮講官四十五年擢禮部右侍郎協理詹事
府四十七年副史繼借總裁會試命教習庶吉士泰昌元年
八月拜禮部尚書兼東閣大學士入參機務未幾與方從哲
劉一燝同受顧命謁誠翼衛中外倚以爲重大帥李如柏如
楨罪當逮中旨寬之與一燝執奏逮如律加太子太保戶部
尚書文淵閣大學士一燝當國協心佐理天啟元年正月請
十二日卽開經筵自後日講不輟從之廷臣請發帑爌一燝
亦以爲言詔發百萬兩候補御史劉重劾一燝及兵部尚書
崔景榮鐫秩調外爌特論救尋加少保吏部尚書武英殿大
學士蔭一子尚寶司丞復加少傅兼太子太傅建極殿大學
士客氏封奉聖夫人大婚成當出外爌一燝引祖制爲言命

擇日出宮二年四月禮部尚書孫慎行劾方從哲用李可灼紅丸藥嬪特疏白其事且曰議法者勿以小疑成大疑編摹者勿以信史爲謗史由是從哲得善去而可灼成邊卽慎行不以爲異議也文震孟建言忠賢嗾上杖之嬪力爭始降級調外三年加少師兼太子太師及楊漣劾魏忠賢二十四大罪忠賢求援於嬪嬪不應忠賢深銜之既葉向高罷嬪爲首輔廉直自持勢不能敵奸詭而同官顧秉謙魏廣徵輩又斷傾之冬忠賢假會推事逐趙南星高攀龍嬪急上言一日去兩大臣臣民失望且中旨徑宣不復到關而攀龍一疏經臣等稟擬又復更易大駭觀聽傳旨切責未幾又逐楊漣左光斗朝政大變故事閣中秉筆止首輔一人廣徵欲分其柄囑忠賢傳諭嬪同寅協恭而責次輔毋伴食嬪惶懼抗疏乞休

命馳驛還籍煥疏謝有左右前後務近端良重綸綍以重仕途肅紀綱以肅朝亡語忠賢等益恨五年七月御史李魯生劾煥削籍又假黃龍光事坐賊二千杖斃其家人煥鬻貨以償棲止先墓莊烈初復故官崇禎元年言者爭請召用爲楊維垣等所扼至五月始遣行人召之十二月還朝復爲首輔上諭以擬旨務消異同二月正月大學士劉鴻訓被重譴煥疏救不聽溫體仁訐錢謙益御史任贊化亦疏訐體仁上切責贊化煥請寬贊化以安體仁上因謂東林於朝事何補煥退具揭言但當論其才品臧否職業修廢而黜陟之若戈矛妄起於朝堂畛域橫分於宮府非國之福也又力救贊化不納皇長子生請盡蠲天下積逋報可時大治忠賢黨煥與李標錢龍錫主之列上患賢客氏而下坐死者崔呈秀等六人

劉志選等十九人坐戍者魏廣微等十一人逆孽魏志德等二十八人城旦者顧秉謙等一百二十七人削籍者徐應元等三十二人間住者黃立極等四十三人名曰欽定逆案頒行天下初熊廷弼傳首至是其子兆璧詣闕疏請爇言廷弼之死由逆閹欲殺楊漣魏大中誣以行賄因盡殺漣等復懸坐廷弼贓銀十七萬刑及妻孥寃之甚者乃許收葬時議汰各鎮兵裁驛卒爇言汰兵止當清占冒及增設冗兵爾衝地額兵不可汰也驛傳疲累當責按臣核減以甦民困其所節省仍還之民上然之三年正月中書舍人加尙寶卿原抱奇劾爇主款以爇袁崇煥座主也上貶抱奇秩無何左庶子丁進工部主事李逢申劾疏繼上爇三疏引疾詔賜白金彩幣馳驛遣行人護歸進逢申並爇會試所舉士也爇先後作相

老成慎重引正人抑邪黨天下稱其賢十七年春蒲州陷憤鬱而卒年八十

李棲鳳字紳元臨晉人萬曆甲辰進士知三原縣入爲兵部主事歷員外郎中尋以西陲有警借補神木道西夷驅衆十餘萬來犯堅壁待之督兵邀歸路破其衆馘斬五百餘級套長吉囊畏威來款塞倡革八年舊賞省金錢三十萬吉囊懼伏不敢出一語再補懷隆副使款夷毛乞炭屢求增賞背盟入寇棲鳳鼓勵將士大陳兵威乞炭懼斂衆求款久之然後許邊境獲甯擢湖廣巡撫兼提督軍務魏璫用事諷直省建生祠棲鳳峻拒之璫恨甚欲爲中傷計會以憂去獲免莊烈御極特起兵部右侍郎鎮昌平屢辭不獲力疾赴任卒於道弟棲鵬以歲貢任井陘知縣能拒強紳關說終慶陽府同知

棲鳳爲諸生時赴省試道經曲沃有老父言爲鹽法所累公得志其拯此一方民棲鳳後卒白當事除其害

張庭蒲州人萬曆三十五年進士四十三年挺擊事起庭上言奸人突入大內狙擊青宮陛下宜何如震怒立窮主謀乃廷臣交章一無批答何也君側藏奸上下蒙蔽皆由陛下精神偏注皇太子召見甚稀而前此冊立選婚及近時東宮出講郭妃卜葬諸事陛下皆弗勝遲回強而後可彼宦寺者安得不妄生測度陰蓄不逞以僥倖於萬一哉不報晉郎中被齟齬引退抑鬱卒天啟初御史張慎言方震孺魏光緒楊新期交章訟庭及陸大受李倖寃乃贈庭光祿少卿都御史高攀龍請加庭倖蔭諡不果

周一梧字唐珪長治人通判欽子幼聰敏留心經濟嘗著十

六策籌時事萬歷壬午以易魁於鄉越十年壬辰成進士授戶部主事歷員外郎中出爲歸德知府未至調常州時以稅關激變改蘇州旣至持以鎮定反側者胥自安明年復變擒首惡數人遣戍之尋以疾請歸家居閉門修郡志秉筆直書迄今稱信史起陝西河西副使時回賊方熾一悟至修戰守具威聲遠播賊遁事聞朝廷方議晉秩遣卒秦人爲樹碑子再勳舉人累官金華府知府

程正家長治人保定通判尙勤子萬歷壬午舉於鄉初授南陽府推官歷讞大獄多所平反時衆兵充斥諸帥跋扈當道重其才識令馳驅米鄧左三帥間有靈閔襄東方城諸捷擒土寇劉中湖於裕州殲巨憝楊四於舞陽及恢復鄧浙二城一歲三膺褒錫唐庶人假入衛謀不軌道出裕州正家適攝

州事尼其行及莊烈震怒有廢錮之命使者慮變屬正家擒之升戶部主事歷員外郎中召買草束樽節爲多督大官糧儲毫無所染國變卒於京

程正己字道先號徵原長治人萬歷丁未進士初授行人司行人九年後先三持節皆以廉介著擢吏部主事歷員外郎中掌典察佐尙書趙南星澄清流品晉太僕寺少卿以都察院僉都御史巡撫保定逆璫魏忠賢以部民交讐拒弗許思乘間中傷之及副都楊漣僉都左光斗難發遂遭削奪謫配平陶莊烈登極起兵部右侍郎轉左時國家多事調兵食日不暇給以勞悴遵疾致仕歸後敘延甯功賜金幣有差旣沒敘四川功賜如前子之璿以卹請贈兵部尙書祭葬蔭子如制

暴謙貞字襟漳屯留人參政孟奇孫也學博才高剛直有祖風萬曆癸丑進士選翰林庶吉士歷吏刑工三科給事中焚草掖垣得昔人批勅遺意典浙江辛酉鄉試稱得士遷太常寺少卿提督四譯館於入館六辭益勤無怠擢河南巡撫與魏瑞忤未任卒

喬承詔字揚名介休人萬曆庚戌進士知南宮縣擢監察御史按閩平海寇地方甯謚以薦舉與當事不合歸杜門著書崇禎中召起爲太僕寺少卿催餉陝西憫其民貧僉疏奏寬減憂勞得疾卒於行署從祀鄉賢

董承業字紹休介休人萬曆癸丑進士官中書歷刑科兵科給事中因陳時事忤宦官魏忠賢被劾免官杜門著書及魏璫敗召起太常寺少卿感痿痺疾告歸卒於家舊介休民多

以輸粟於邊蕩產承業適奉差至大同言於巡撫得改折色民永便之

王文清永甯州人萬曆己未進士累官都察院右副都御史巡撫遵化等處清介端方朝野倚重致政歸父維棧贈奉政大夫刑部郎中祀鄉賢事實無可考

張養蒙字泰亨澤州人萬曆五年進士選庶吉士歷吏科左給事中少負才名明習天下事居言職慷慨好建白時南北多水旱條上治奸民恤流民愛富民三事上嘉納之錦衣都指揮羅秀質緣得僉書言秀本太監膝祥奴賄入禁衛往歲營僉書兵部尙書王遴持正爲所中傷去未幾秀卽職用物議沸騰疏發其狀乃黜秀御史高維崧等言事被謫養蒙偕同官論救復特疏訟之奪俸故事部曹不得改科道至是多

營求以養蒙言而罷尋選工科都給事中採木四川及額商人輪木後者詔追銀以養蒙言獲免都御史潘季馴奏報河工疏言河臣報成未久急求謝事而繼者復告患矣其故皆由不久任也夫官不久任其弊有三後先異時也人已異見也功罪難執也請做邊臣例增秩久任上深然之詔潞安進綱二千四百匹復命增五千率同官力爭不從出爲河南右參政尋召太僕少卿四遷左副都御史二十四年極諫時政闕失有三輕二重謂部院之體漸輕科道之職漸輕撫按之任漸輕而進獻之途及內差之勢漸重也語皆切中不報又明年六月兩宮三殿繼災復上疏曰近日之災前古未有請躬謁郊廟以謝嚴譴立御便殿以通物情早建國本以繫人心停銀礦皇店之役杜四海亂階減宦官宮妾之刑弭蕭牆

隱禍然此皆應天實事猶非應天實心也臣仰瞻穆清成心有四一曰好逸一曰好疑一曰好勝一曰好貨願戒此四者亟圖更張庶天意可回國祚可保不省尋遷戶部右侍郎督朝鮮餉事甯予一子官三十年署部事會有疾固辭罷歸卒於家天啟初賜諡毅敏

楊植陽城人萬曆丁丑進士任益都知縣嚴明果斷夙弊頓絕在任六年纖毫不染擢大理司評事轉兵部主事守山海關通商賈兵戎關政一新轉刑部員外郎歷薊州僉事河南參議遼東副使所至稱能終養歸起補陝西關西道益勵操守加意振刷疾革家人雜贖鍍檄諸文移中怒而擲去居官三十年僅茅屋數椽田三十畝

衛一鳳字伯瑞陽城人萬曆庚辰進士授刑部主事歷郎中

嶮然不淄有國士稱升紹興知府丁內艱起青州府政簡而肅忤御史將計傾之東撫孫鑣語所屬曰衛某飲青州一勺水安能浼也薦升鞏昌副使火直入犯以捷賜金丁外艱起青州兵備時河決黃家口諸地改濟甯河道一風結茆河濱晝夜督修三年報最有治河如治兵之稱年饑米價騰貴一鳳預支諸役廩始高其價商集價減人咸賴之遷參政復移青州升應天府丞妖民劉天緒倡亂密以方略捕滅轉鄖陽巡撫會秦寇嘯聚草檄遣裨將諭以禍福遂解散節省兵餉七千有奇晉南兵部侍郎遷南刑部尙書改兵部屢疏乞休不允晉階資德大夫正治上卿天啟元年三疏得歸未幾魏忠賢禍起人服其先見云居家十三年壽八十四卒贈太子少保遣官祭葬子廷憲成進士歷知淮安有父風

白所知字廷謨陽城人萬厯間以解元登癸未進士授禮部主事厯郎中秉公持潔直聲達於宮禁每啟事朝上夕下數裁抑貴倖以憂去罷官杜門謝客優游林下二十年光宗卽位召起太常少卿厯轉工部左侍郎修慶陵工竣賜幣晉尙書累疏求去賜乘傳歸復以三殿成敘功加太子太保既歸究心理學及養生家言食不兼味衣無紈綺見後生諄諄教以孝弟謙謹享年八十六所著惺心錄見三晉語錄

韓范字思兼沁水人萬厯丙戌進士授工部主事理南旺閘立八禁調十二事漕商兩利升營繕司員外進兵部武選司郎中適選軍政嚴毅廉靖黜中璫所私千戶鮑供權貴銜之借霍文炳事降陝西金縣典史丁外艱貧不能襄喪事當道力助之始勉成禮家居二十七年泰昌初起南武選司郎中

天啟元年升商通政司右參議明年升順天府丞進通政司右通政值魏忠賢矯旨杖郎中萬燦范上執政書引王文端封還詔書事以諷之海內翕然仰焉後時政日非自以不合時宜作五官四體問答寓意致仕年六十九卒所著有經世集要司馬紀略司空紀略家訓格言本支世系圖考藏於家張志芳字廷芝陽城人萬曆辛卯舉人性篤孝父喪三年不居於內初任陽信知縣值歲大祲設法振濟全活以數萬計升宿州陽信父老號泣攀留不忍舍建生祠豎碑張潑扁其第曰天下清廉第一以內艱歸起補滄州改知景州景當白蓮之變愚民蠢動單騎曉諭告以禍福卒歸田畝境賴以安又甦驛傳申保甲除羨耗三年獨居一日迎漕使偶墮水拯出易衣皆粗布無寸帛使者嘆曰真清正人也特疏表異擢

戶部員外景民立祠奉命署太倉甫兩月積餘米一千七百石奏聞賜宴旌之升郎中督天津餉親視權量三軍戴德晉僉事仍蒞津門焦勞拮据釐諸弊孔飛輓時至璽書褒之加升一級進參議積勞成疾卒於官軍民聞訃各以白布括髮號泣爲建祠豎碑

孫居相字伯輔沁水人萬曆二十年進士除恩縣知縣徵授南京御史負氣敢言嘗疏陳時政謂政事日廢治道日乖天變人怨究且瓦解土崩縱珠玉金寶互地彌天何救危亂不省誠意伯劉世延罪廢居南京益不法疏發其奸并及南京動臣子弟梟橫狀遂下世延史安遠東甯忻城諸侯伯子弟悉按問強暴爲戢稅使楊雲激變雲南太和山中官黃勳嘆道士毆知府皆極論其罪時中外多缺官居相兼攝七差署

詣道印事皆辦治劾大學士沈一貫奸貪植黨一貫遂去居
相亦奪祿一年服闋起官巡漕運吏部侍郎方從哲由中旨
起官中書張光房等五人以鯁議擯不與科道選並抗章論
列時言路多附吏部居相力與抗氣不少沮於是過庭訓唐
世濟李徵儀劉光復趙興邦周永春姚宗文吳亮嗣汪有功
王萬祚輩羣起爲難居相連疏措拄迄不能害四十五年卒
以年例出江西參政不就天啟元年起光祿少卿改太僕擢
右僉都御史巡撫陝西四年春召拜兵部右侍郎其冬魏忠
賢盜柄復引疾歸給事中陳序劾居相出趙南星門結楊漣
虞廷陛又劾居相力薦李三才遙結史記事遂削奪崇禎元
年起戶部右侍郎督鼓鑄改吏部左侍郎以戶部尙書總督
倉場請轉漕無多雇民舟給事中楊時化劾高平知縣喬涓

貪虐坐贓二萬有與援而居相報時化書憤激請戍卒弟
鼎相歷吏部郎中副都御史巡撫湖廣亦有名東林中

張五典字和衷沁水縣人萬曆壬辰進士授行人遷戶部主
事監天津倉歷員外郎遷郎中值京察執政假中旨留其私
人五典上書亟論其失出爲濟南參議遷河南副使時大盜
張西岡妖人潘大賢聚衆爲亂五典授諸將方略先後俱撲
滅已而桐柏礦賊起五典偵得其狀隨出三牌一禁入山鬻
賊食者一令亟爲食飲以待賊一令民各歸鄉井賊無所得
食出見壺漿陳路隅大驚詰其故曰此張道翁指也因出牌
示之皆感泣去遷山東參政守海右歲荒盜且起遼米因海
禁不得時至會攝登萊道築開海禁遼船至者相屬遷山東
右布政入爲太僕寺少卿遷南京大理寺卿乞終養加兵部

尚書卒贈太子太保五典性嚴重居朝廷中立無所附張新建在位欲令出門下卒不往雖平進九列卒亦不獲大用云張銓字字衡五典子萬厯三十二年進士授保定推官擢御史巡視陝西茶馬憂歸起按江西時經略出師銓馳奏言以短擊長以勞赴逸以客當主非計之得今不必徵兵四方但當就近調募屯集要害若加賦選丁騷擾天下恐識者之憂不在一方因請發帑金補大僚宥直言開儲講先爲自治之本又言今宿將並起宜一事權唐九節度相州之潰可爲明鑑又言張承蔭不宜恤又論經略非大帥才而力薦熊廷弼四十八年夏復上疏言自軍興以來所司創議加賦畝增銀三釐乃未幾至七釐又未幾至九釐譬之身一方肩背也天下腹心也今合天下以救一方一方未必安而天下已危宜

聯人心以固根本豈可賤削無已驅之使亂且內廷積金如山以有用之物置無用之地與瓦礫糞土何異乃發帑之請叫閭不應加派之議朝奏夕可臣殊不得其解銓疏皆關軍國安危而上與當軸卒不省熹宗初出按遼經略下納降令銓力爭不聽曰禍始此矣天啟元年三月請令巡撫薛國用帥河西兵總督文球帥山海兵以廣聲援疏甫上軍大潰銓與袁應泰分守應泰令銓退保河西不從守三日銓衣冠向闕拜又遙拜其父母自經事聞贈大理卿再贈兵部尙書諡忠烈官其子道濬錦衣指揮僉事詔以所贈官加父五典妻霍氏守竇莊堡名夫人城道濬既官錦衣以忠臣子見重屢加都指揮僉事僉書衛所受王永光指屢疏攻錢龍錫成基命文震孟毛羽健等卒戍海甯

楊新期字周卜陽城人貞肅七世孫萬厯丁未進士初任項城知縣調雍邱補蠶吾調渭南凡四縣清名籍甚百弊釐剔擢御史抗論三案不避觸諱按湖廣興除皆闕百年利弊復命謝絕竿牘甚峻熹宗朝忤魏忠賢削籍崇禎初召還臺持憲紀十三年衣大布飯脫粟不愧祖風

王用士字旂召陽城人萬厯己酉舉人事繼母以孝聞任考城仁聲籍甚豪猾伏匿補靜海建義倉清郵傳繕城垣濬河渠邑舊無志創修之三載績最會漕運覆損菽石臺司責償於靜正辭拒之曰秋水時至靜民何辜君其問諸水濱臺司遂疏罷其官即日怡然就道父老臥轍垂涕不忍捨既抵里杜門謝客督課諸子卒年六十有九

張慎言字金銘陽城人祖昇河南參政慎言工詩文舉萬厯

三十八年進士除壽張知縣有能聲調繁曹縣出庫銀糴粟備賑民賴以濟泰昌時擢御史劾罷順天府丞劉蔚太常少卿官應震光祿少卿劉光復會議三案言不究張差黨與所以全父子之情然必摘發奸謀所以明君臣之義至崔文昇投涼劑李可灼進紅丸法當駢首恩反賜金誰秉國成一至此極若夫鼎鬯爲重簪履爲輕卽神廟之鄭妃且先徙以爲望選侍不卽移宮計將安待無何賈繼春以請安選侍被譴疏救之奪俸二年天啟初督畿輔屯田言天津靜海興濟間沃野萬頃可墾爲田近同知盧觀象墾田三千餘畝其溝洫廬舍之制種植疏濬之方犁然具備可倣而行因列上官種佃種民種軍種屯種五法又言遼人入關宜招集津門以無家之衆墾不耕之田於計爲便從之嘗疏薦趙南星劾馮銓

五年三月假歸曹欽程誣劾之徵賊戍肅州崇禎元年起故
官請京察先治媚璫者其他始付考功報可旋擢太僕少卿
歷太常卿刑部右侍郎讞耿如杞獄不稱旨下吏歸久之召
爲工部右侍郎廷議開採鼓鑄屯田鹽法諸事悉根本計大
學士楊嗣昌議改府州縣佐爲練備練總慎言以更制事大
歷陳八議其後卒不能行由左侍郎遷南京戶部尙書七疏
引疾不允尋改南京吏部尙書掌右都御史事後寓蕪宣間
疽發戒勿藥卒年六十九慎言少孤鞠於祖母爲御史計聞
乞歸執喪三年

張光前字爾荷澤州人萬曆三十八年進士授蒲圻知縣補
安肅擢吏部驗封主事歷文選員外郎稽勳郎中乞假去天
啟四年吏部尙書趙南星起爲文選郎中甫視事魏忠賢假

廷推謝應祥事矯旨切責南星時與推應祥者員外郎夏嘉
遇非光前也光前抗疏爭之曰南星人品事業昭灼人耳目
忽奉嚴旨責以不公忠臣竊惑之選郎諸曹領袖尙書臂指
南星所甄別進退臣實佐之功罪與共乞先賜罷斥亦被旨
切責尋以推喬允升等代南星削侍郎陳于廷及楊漣左光
斗籍光前又抗疏曰會推尙書于廷主議臣執筆謹席藁待
罪遂貶三秩調外光前操行清嚴峻卻請謁知縣石三畏賊
私狼籍將受臺諫出爲王官明年光前兄右布政使光縉治
兵遊化奄黨門克新劾之亦削籍兄弟並以忤奄去見稱於
世崇禎元年起光祿少卿不赴三年起太常已進大理少卿
累疏乞休卒

韓肫仁字伯倫沁水人萬曆癸丑進士授大理寺評事殫心

訊牒每於死中求生而平反之由寺副厯寺正凡三年升青州知府除供億興學校清滯獄摘黠吏抑豪右開水田懲左道興利除弊事事修舉適白蓮教聚徒數千有欲借以邀功者肫仁不可止捕首惡抵法餘解散嘗攝道篆鉤餘數百金悉貯庫筦庫者以例請肫仁曰若知取羨例耶不知不取羨吾例也嚴叱之旌節幸禮士夫吏畏民懷適仲弟訃至一痛幾絕日夜悲思曰人四體而失其二何能身遂上書告終養解綬歸青老幼牽衣填道不忍舍抵家旬月乃下褒章準以副使職銜終養尋奉旨旌其門曰節孝所著有養中養才類

編

王允成字述文澤州人萬厯中舉於鄉除獲鹿知縣以治行異等徵授南京御史首論遼左失事諸臣請正刑辟熹宗初

降兩諭罪李選侍大學士方從哲封還之允成陳保治十事
姚宗文鼓同列攻熊廷弼允成惡其奸再疏論列天啟元年
請卹先朝直臣列楊天民等三十六人以上從之俄陳任輔
弼擇經略慎中樞專大帥更戎政嚴賞罰數事未言陛下孤
立禁中先朝怙權恃寵諸奄與今日左右近習互相忌嫉恐
乘機肆毒彼此相戕夫防護禁庭責在內閣及司禮務令潛
消默化俾聖躬與皇弟並得高枕無憂斯根本至計已劾刑
部尚書黃克纘倡言保護選侍貽悞賈繼春又曲庇盜竄內
侍至辨御史焦源溥綱常疏刺謬特甚又極論內降及留中
之害停俸已疏斥府丞邵輔忠又請戒姑息破因循時中貴
劉朝魏進忠與乳媪客氏相倚爲奸抗疏歷數其罪三年六
月允成又劾魏進忠進忠者忠賢初名也四年吏部尚書趙

南星調允成於北御史張訥劾南星調允成非法遂除名後給事中陳維新復劾之詔提問坐以贓私莊烈帝初以允成嘗請保護皇弟識其名召復故官未幾卒當天啟初東林方盛允成居南與北相應和時貴多畏其鋒諤諤敢言屢犯近倖其風采尤足重云

田蕙應州人萬曆甲戌進士任蒲城知縣升戶部主事歷通政司左右參議性剛直不阿爲忌者所中歸里杜門謝客躬耕訓讀士論多之

王家璧山陰人家屏從弟萬厯己卯舉人薊州府通判性廉介不爲矯激時有誣陷良善力爲昭雪署嘉定太倉篆興除釐剔洞悉民艱以直道忤時改除河間督運楊村畿輔大旱河水涸躬率畚築決渠引水使者旌其勞勤以疾歸

陸敏捷大同人萬曆壬午舉人性率真達於政事任狄道知縣興利剔弊多善政升德州知州稅監陳增馬堂一地雙科商民併苦敏捷調處歸併遷河間同知時靜海縣饑民煽禍敏捷擒首惡散黨與不動聲色而定謝掣鹽常例重修天津城築重隄護運河迄今猶稱陸隄

馮呈秀大同人萬曆甲辰進士初告終養授評事遷寺正卹刑雲貴全活甚衆出守延安捐俸治河患時有邊警呈秀單騎爲士卒先邊境無虞治大猾孫養蒙尋備兵商維升漳南參政山寇起伏不常設謀擒斬民賴以甯至今立祠祀之王從義大同人天性孝友端方廉介登萬曆丁未進士授評事多所平反歷郎中升東昌知府以勸農興學爲首務修濬城池後兵火頻仍卒恃以無恐士民因勒石建祠祀之秩滿

以副使備兵壽張會徐鴻儒變多方弭制殲渠魁而安善民全活數萬人兗民至今頌之遷河南參政未幾賊黨復萌以右布政備兵沂州嚴立保伍一境帖然擢河南左布政持身廉約禁絕饋遺戊辰晉副都御史巡撫山東適歲祲招撫流移數萬人開墾荒田擊除大猾不遺餘力尋以協餉功進戶部右侍郎引疾歸總督楊嗣昌特舉不起母喪哀毀骨立幾至於絕

李懷信大同人由世蔭歷都指揮僉事掌山西都司廉勤數被推薦萬厯中遷延綏中路參將進定邊副總兵勇敢有謀敵入輒敗四十三年擢甘肅總兵官延人爲立生祠松山敵入掠蘆溝墩邀擊大敗之斬首三百有奇獲駝馬甲仗無算已復分三道犯鎮番諸堡亦分遏之敵引還將士尾其後獲

首功百九十有奇自後敵每入多失利去威名著河西四十七年充援剿總兵官馳赴邊經略熊廷弼令偕柴國柱賀世賢以四萬人守瀋煖免炒花謀入廷弼急移懷信戍首山敵不敢入旋引疾去天啟二年起鎮大同明年罷後追錄邊功進左都督卒

何廷魁字汝謙威遠衛人萬曆二十九年進士授涇縣知縣調甯晉遷刑部主事歷歸德衛輝河南知府西甯副使坐考功法復爲黎平知府遷副使分巡遼經略網降爭不聽同事者遣孛歸廷魁曰吾不敢爲民望廷魁論兵事經略並不從及潰懷印率其妾高氏金氏投井死婢僕從死者六人贈光祿卿再贈大理卿賜祭葬諡忠愍世蔭錦衣百戶

麻貴右衛人大同參將祿子也由舍人積功至都指揮僉事

充宣府遊擊將軍隆慶中遷大同新平堡參將寇大入山陰懷仁應州與兒副將錦拒戰有功受賞萬厯初再遷大同副總兵十年冬以都督僉事充甯夏總兵官尋徙鎮大同頻以安邊勞蒙賜資十九年閱祝少卿會乾亨劾之謫戍邊明年甯夏哱拜反廷議貴健將知兵且多畜家丁起戍中爲副將總兵討賊屢攻城不克五月哱拜以套部五百騎圍平魯堡選精卒三百間道馳卻之遷攻城率遊兵主策應哱拜至北門出戰將往勾套貴逐入城不敢復出俄蕭如薰將諸道援兵以貴爲副而李如松軍亦至攻益急城破賊盡平貴以功增秩予蔭擢總兵官鎮守延綏二十二年七月卜失兔深入定邊營張春井貴乘虛搗其帳於套中斬首二百五十有奇還自甯塞復殲其零騎會寇轉掠至下馬關甯夏總兵蕭如

薰不能禦總督葉夢熊急檄貴赴援督副將蕭如蘭等連戰
颺馬臺薛家窪斬首二百三十有奇獲畜產萬五千上爲告
廟宣捷進署都督同知于世蔭明年勒兵萬五千人遊擊閭
逢時等出紅山爲中軍參將師以律等出高家堡神水孤山
爲左軍參將孫朝梁等出定邊安邊平山爲右軍而自以大
軍當一面銜枚疾趨踰塞六十里寇莫知所防大潰俘斬四
百有奇獲馬駝牛羊千五百再進秩予蔭尋以病歸二十五
年日本封事敗起備倭總兵官加提督盡統南北諸軍貴馳
至朝鮮王京數戰有功明年三月旋師進右都督于世蔭三
十八年鎮遼東泰甯炒花子色特入犯伏兵敗之追北至白
雲山斬馘三百四十有奇色特復糾諸部合犯清河皆潰遂
求款邊境獲甯明年搆漢虎墩兔以三萬騎入掠穆家堡禦

之敗去夏貴引病乞罷詔乘傳歸貴男毅驍捷善用兵東征西討並著功伐先後承欽賜者七錫世蔭者六稱一時良將焉

霍鏐字中明馬邑縣人教諭朝重子萬歷丙辰進士授任邱縣知縣擢監察御史出按甘肅奉勅兼督學政大閱比復命敘功不及廠臣又爲楊左諸賢抗疏申雪與逆璫忠賢忤矯旨削秩歸崇禎初起補原官仍督直隸學政有疏請正人心端士習凡七款遷順天府府丞晉通政使司通政使時懷宗綜覈名實鏐方以廉敏結主知逃以積勞卒先是在臺中時嘗題豁本邑荒糧千餘石又以雲中歲饑請發帑金三萬兩振濟著有虞邱案牘兩河憲檄蘭臺督學奏議兩河畿輔造士錄校士氣先錄並文集年譜諸書藏於家

潘文甯化人萬厯乙未進士知陝西漢中府案無塵牘斷獄片言居要左右不得關其說月朔與諸生講程朱業名士多出其門礦賊俞士乾聚眾數載爲暴文設策招安令充牙兵未一載復橫文以計擒之漢中獲安堵

魏雲中字定遠武鄉人萬厯二十九年進士除項城知縣擢御史劾禮部侍郎史繼偕南京兵部尙書黃克纘又劾太僕少卿徐兆魁貪穢尋劾誠意伯劉蓋臣又劾文選郎中周應秋納賄鬻官引進匪人流毒天下給事中吳亮嗣詆雲中借端掃除吏部尙書趙煥亦爲應秋辨遂劾煥曲庇屬官亮嗣諸吏部秋以年例出爲甘肅僉事不赴天啟元年起通州兵備召爲尙寶卿三年冬屢遷右僉都御史巡撫甯夏繕堡鑿渠興屯練士明年罷歸崇禎二年召拜兵部右侍郎行邊還

言王象乾策善款議始定乃列上八事訪屬部厚偵探謹內外恤將卒修營舍復額兵定功罪擇守令上褒納之象乾請老卽命兼右僉都御史總督宣大山西軍務帥師入衛三年罷歸家居修城築臺以禦寇鄉人賴之

程啟南武鄉人萬曆辛丑進士授襄陽推官升兵部武選司主事歷郎中遷濟南道副使會大饑繪圖使吏抱以上書乞不賦山澤許得支官舍之儲蓄賑之所活甚衆時青齊盜發練兵芟薙盜悉平屢遷藩臬晉太常寺卿所在有冰蘖聲論魏璫疏入卽日斥退璫敗起通政使加工部左侍郎以疾辭歸鄉居請豁沁州浮糧累金三千餘兩條立權店守備治次舍設防兵三百名壽九十

霍守典沁州人萬曆庚戌進士禮科都給事中天啟間魏璫

以生祠額名請守典特疏糾參瑞恚甚除太常少卿隨罷職
家居遇流寇變捐已資週城築柵馬牆爲捍蔽後州人不及
進城者多賴保全

魏光緒字孟韜號元白武鄉人萬曆癸丑進士由行人授御
史挺擊一案聚訟十餘年光緒抗疏再四卒屈傍議東巡招
撫寇孽數十萬瑞逆囑所親不遂矯旨降調戊辰起原官尋
升太僕卿力爭本寺牧地十萬餘頃升湖廣巡撫殲倡亂渠
魁計平土司彭元景爲忌者所中罷歸遇屢饑盡發積粟以
振之立慈幼局乳遺棄嬰兒捐資修築城垣義舉尤多

傅霽字應恬忻州人參政霖弟忠鯁能任事萬曆丁丑進士
初授咸陽知縣庫吏進羨金叱還之恐其中飽因取抵下戶
丁徭補華亭革除縣櫃之役入爲監察御史巡漕河時內供

增二十萬金猶不足將取諸房嘗抗疏論之得中止按四川發大帥李大祥奸賊李燾千金求免卒論罷有職憲副者怠於官亦糾劾以去人病其執因告歸閉門纂晉文獻通志同兄參政被誣特疏白之先是江陵當國鄒總憲元標以爭奪情請都勻霈數往視爲措道星贊

張泮忻州人萬曆丙辰進士耿介廉直居銓曹嚴絕餽遺終養二十年朝野想望其丰采屢起留銓習壘卿俱不出親沒從太原歸葬徒步哀泣感及行路尋補通政册封藩王王肩輿過節前泮正色斥之劾不敬奪祿遷太僕卿薦守令一介不取進光祿時閹豎弄權假內用冒破不賞疏正其罪卒日遺橐僅十一金殯葬不能具子宏業死鬪難別有傳孫凝和官順天府通判

鄭友周字仁甫定襄人萬曆壬辰進士授保甯推官丁外艱
補甯國升刑部主事歷禮部郎中四川南兵備道副使陝
西神木兵備道參政以邊功加升右布政在禮部時掌御醫
藥物會東宮取藥票未用印拒執不與東宮呼爲硬漢川南
奢人安堯臣以爭印叛數年不能平領兵深入破其巢洞奪
印而還神木躬冒矢石大戰峰子梁斬獲首功一百二十一
級捷聞升一級蔭子鉞百戶世職屢舉卓異爲當事者所忌
遂歸友周學術醇正操守狷介爲諸生時拾金不取方伯歸
望里門卽下輿步入與鄉人處諄諄可親訓後學子弟循循
善誘未幾卒

張保民定襄人萬曆甲午舉人知完縣多惠政完人德之作
福完錄立生祠升西安同知卒於官

李楠崞縣人萬曆丁丑進士授刑部陝西司主事屢攝湖廣
浙江諸司事歷員外郎中出守直隸鳳翔府補保定府遷陝
西副使分巡河南尋改靖邊兵備親歷川原籌邊務屢疏乞
身七年復起陝西副使分巡河內遷本省按察使歷布政使
擢巡撫楠起家刑曹游歷開府清介公正及持節西陲積勲
斬爲京觀城垣屹如金湯戰苦功高朝廷特以璽書褒之
楊恂字伯純代州人萬曆十一年進士授行人擢刑科給事
中錦衣冗官多至二千人請大加裁汰不用累遷戶科都給
事中征倭師多冒破帑金請嚴勅邊臣而劾武庫郎劉黃裔
侵耗黃裔卒罷尋上節財四議格不行御史冀體極論首輔
趙志皋貶三秩復斥爲民恂論志皋并及張位疏入忤旨以
原品調陝西按察經歷引疾歸久之吏部尙書蔡國珍起廢

及恂未召卒

楊夢弼五臺人萬厯庚子舉人任浙川蝗不入境時萑符盜起親詣賊壘諭以順逆賊衆拜伏調榮澤擒巨寇祝布論如法闔境稱快升陝西鞏昌同知撫按交疏懇留士民復詣闕請遂改授開封同知本府儀封王所爲不軌與撫按議奏撫按難之夢弼曰孔子墮三都強公室今強藩不法安忍坐視遂詣闕陳情王懼遣金十萬卽將原金解奏詔削王籍爲庶人名震中州神宗親書御屏曰天下清官第二員賜勅褒美丁父喪歸親築塋三年內瘦削骨立以哀毀卒

孫傳庭字伯雅代州振武衛人自父以上四世舉於鄉傳庭儀表頎碩沈毅多籌略萬厯四十七年成進士授永城知縣以才調商邱天啟初擢吏部驗封主事屢遷稽勳郎中請告

歸家居久不出崇禎八年秋起驗封郎中超遷順天府丞陝西巡撫甘學闇不能討賊秦士大夫譁於朝乃推邊材用傅庭以九年三月受代傅庭泣秦殿徵發期會一從軍興法秦人愛之不如總督洪承疇然其才自足辦賊賊首整齊王據商雒檄副將羅尙文擊斬之當是時賊亂關中有名字者以十數高迎祥最強拓養坤黨最衆所謂闖王蝎子塊也迎祥至盩厔傳庭設方略親擊迎祥於盩厔之黑水峪禽之獻俘闕下錄功增秩一等而賊黨自是乃共推李自成爲闖王矣明年拓養坤及其黨張耀文來降傳庭復清屯軍得守兵九千餉銀一十四萬兩有奇米麥二萬石有奇上命諸撫以陝西爲法而兵部尙書楊嗣昌嫉之時議合勦計用兵十二萬加餉至二百八十萬限百日平賊令傳庭扼商雒傳庭言兵

貴精不貴多恐致潰蹶且民不堪重困又言賊入商雒而臣不能禦則治臣罪若臣扼商雒而踰期不能滅賊誤勦事者必非臣嗣昌益銜之十一年春坐失援漢陰石泉削加秩大天王等犯慶陽竇雞傳庭復簡勝兵六千人由商雒還軍戰合水破走之獲其二子會過天星混天星等逼澄城復分兵五道力戰楊家嶺黃龍山大敗賊大天王遂降傳庭駐中部率標兵東過而檄曹變蛟等從慶陽西拒且伏兵三水涇化間賊饑出掠傳庭一日夜馳二百五十里賊驚西奔至職田莊遇伏走竇雞復折而走隴州皆遇伏凡三敗賊死無算過天星流天星並降又討平漢中餘賊降鄠縣一條龍城固搖天動而闕王李自成者爲洪承疇所逐盡亡其卒以十八騎潰圍遁關中羣盜悉平上大書命加傳庭部銜嗣昌格不奏

河南賊羅汝才馬進忠賀一龍左金王等十三部西窺潼關傳庭計曰天下大寇盡在此矣乃引兵東賊退追出關連戰閔鄉靈寶山間賊大敗貫其營而東復自東而西賊窘甚忽得熊文燦檄謂毋妬吾撫功傳庭怏怏還嗣昌抑將士功不爲奏傳庭懇請上其籍於部亦不許十月召入衛俄擢兵部右侍郎兼右僉都御史督諸鎮援軍賜尙方劍傳庭提兵援近郊與嗣昌不協又與中官高起潛忤降旨切責不得朝京師無何嗣昌用承疇爲薊督欲盡留秦兵之入援者守薊遼傳庭爭之不能得不勝鬱鬱耳遂冀傳庭初受命疏言年來疆事決裂由計畫差謬事竣當面請決大計明年帝移傳庭總督保定河南軍務既解嚴疏請陛見嗣昌大驚謂傳庭將傾已斥來役齎疏還之傳庭傳庭愠遂引疾乞休嗣昌又劾

其託疾非眞龔上遂發怒斥爲民十三年正月命長繫待決
及文燦撫事壞嗣昌敗上漸思傳庭兵部尙書陳新甲偕廷
臣多薦之十五年正月詔起兵部右侍郎召見傳庭指陳形
勢上勞獎甚至賜酒饌銀幣命督京軍救開封傳庭兼程馳
赴會汪喬年敗沒賀人龍潰入關中卽命往代且諭密誅人
龍傳庭與巡撫張爾忠等謀召人龍斬之而撫定其部曲益
日夜治軍六月上遣御史蘇京趣出關傳庭上言兵新募不
堪用上不聽不得已出師九月抵潼關而開封已陷自成西
行逆秦師傳庭設三覆以待賊潰東走斬百千餘追三十里
及之郊縣之冢頭賊棄甲仗軍資於道秦軍趨利賊反乘之
諸軍皆潰傳庭走鞏縣由孟縣入關是役也天大雨糧不至
士卒採青柿以食凍且餒故敗豫人所謂柿園之役也傳庭

既歸陝西益募勇士開屯田繕器械粟令三家出一壯丁置
火車三萬輜載火礮甲仗戰則驅以拒馬止則還以自衛士
大夫厭苦傳庭所爲用法嚴不樂其在秦相與譁於朝又以
危語恫脅明年五月命兼督河南四川軍務進兵部尙書改
稱督師加督山西湖廣貴州及江南北軍務賜尙方劍趣戰
益急傳庭頓足歎曰奈何乎吾固知往而不反也不得已遂
再議出師總兵牛成虎將前鋒高傑將中軍王定官撫民將
延甯兵爲後勁白廣恩統火車營檄左良玉赴汝甯夾擊令
陝西巡撫馮師孔駐商雒而遣成虎以三千餘騎先趨雒陽
至澗池擊走賊游兵八月遂統大軍出至滋澗下馬搜伏賊
走又追至汝州賊盡奔寶豐九月師次汝州僞都尉李養純
降謀報賊老營在唐縣僞將吏屯寶豐傳庭遣將襲唐縣而

自趨攻寶豐自成來援廣恩傑夾擊再戰自成敗走遂克寶
豐他將亦克唐縣師次郟縣賊萬騎逆戰復大破之軍聲大
振會天久雨道漚糧車不能前攻破郟縣截得馬贏數百殺
食之兩七日夜不止後軍譟於汝州陰通賊賊大至傳庭乃
分軍三令廣恩由大道已與傑由小道還軍迎糧而留副將
陳永福爲後拒戒毋動前軍既移後軍亂永福雖斬之不能
止亦引退賊追及之二十一日官軍還戰賊置陣五重官軍
力戰已破其三重遇驍騎陣稍動推火車者駭棄車走馬軍
亦走賊騎乘之官軍死者四萬餘人傳庭單騎渡垣曲由閩
鄉濟賊乘勝破潼關大敗官軍傳庭與監軍副使喬遷高躍
馬大呼而沒於陣初傳庭之出師也自分必死顧語繼妻張
夫人曰爾若何夫人曰丈夫報國耳勿憂我及西安破張率

二女三妾沈於井揮其八歲兒世甯亟避賊去之兒踰牆墮民舍中一老翁收養之長子世瑞聞之重趼入秦得夫人尸井中面如生翁歸其弟相扶攜還傳庭死時年五十有一矣尸竟不可得再出師皆以雨敗也或言傳庭未死者帝疑之故不與贈恤

國朝賜諡曰忠靖

任養心芮城人萬厯甲戌進士濬縣知縣擢御史按兩淮鹽政條通商恤竄四事迄今爲例按湖廣奉詔籍江陵家排浮議存國體又按順天奏治豪貴彈去大帥京師肅然厯升巡撫江西嚴什伍法而盜息又懲宗人之不軌者以病疏歸所著有中丞奏議子治統庚子舉人道統乙卯舉人姪光統庚子舉人丁未進士

劉敏寬安邑人萬曆丁丑進士官至兵部尚書總督三邊大子太保賜飛魚蟒玉以軍功蔭子錦衣衛指揮世襲卒後進階少保賜祭葬祀名宦祠敏寬長才大略久歷邊疆所至簡兵蒐乘備糈儲繕城堡自撫至督共計捷三十有奇與諸將吏推心置腹更善譚道論文榆林人感德立祠祀之

王國貞安邑人萬曆己丑進士累官陝西參政初令壽光邑濱海多葦租盡捐充邑賦之半守上谷廉明冠畿輔嚴毅有風節每與時忤及參秦藩遂有中者而介終不可易也歸臥林皋捐胥以百金求居間怒叱之終其身不可干以私

王紀字惟理芮城人萬曆十七年進士授池州推官入爲祠祭主事歷儀制郎二十九年將舉冊立典數遷延不決紀抗疏極論曰勿持不斷之意兼無影之疑冬禮成攝光祿少卿

引疾去四十一年自太常少卿攝右僉都御史巡撫保定諸
府歲浚饑救荒甚備活貧民百九萬人稅監張煜請征已捐
諸稅紀兩疏力爭竟取中旨行之紀劾煜抗違詔書沮格成
命不報浚事四年部內肅然遷戶部右侍郎總督漕運兼巡
撫鳳陽諸府歲饑振救如保定四十八年議航漕三十萬石
由淮達遼紀力持不可而颶風覆七十萬石光宗立召拜戶
部尙書督倉場天啟二年代黃克纘爲刑部尙書因亢直忤
魏璫削籍朝臣多疏留之後歸角巾野服曰予不幸以大臣
行言官事而又不得良愧古人四年卒崇禎初復官贈太子
太保諡莊毅

謝傳顯安邑人萬曆乙卯舉人授曲陽知縣開渠灌田五百
頃升大名同知適流寇犯界督衆力戰民獲安堵署長垣辨

獲假巡方齊文舉聲名丕著豫督王家貞以豫省被寇特疏保升宛守詰兵措餉著有成績致仕歸閉門著書子孫科第世濟其美

裴一諫夏縣人唐晉國裴文忠公之後也徙居夏萬厯間貢事親極孝操行敦篤與真子曹總憲友善以理學交相勵授中部訓導土風丕變丁內艱歸諸生泣涕追送不忍舍後補唐山教諭升山陽知縣地瘠民貧逋逃甚衆極意招徠流民復歸革紙戶稅革里支費革收頭陋規日以孝弟事實陰陽錄二書勸諭百姓療疫振荒築垣修隄百姓繪像祀之乞歸行李蕭然著有語錄諸集行世

曹于汴字自梁安邑人萬厯十九年舉鄉試第一明年成進士授淮安推官擢吏科給事中疏劾兩京兵部尙書田樂邢

玠及雲南巡撫陳用賓樂玠遂引去疏雪吏部郎趙邦清謁
告歸僦屋以居不蔽風日起厯刑科左右給事中朝房災請
急補闕官修廢政進吏科都給事中極論中官陳永壽罪故
事章疏入會極門直達御前至是中官必起視力請禁之三
十八年典外察明年典京察力持東林議衆不能奪移疾歸
光宗初以太常少卿召改大理少卿遷左僉都御史佐趙南
星京察進左副都御史天啟三年秋副推吏部右侍郎中旨
特用于沐于沐以首推馮從吾名位先已義不可越四辭不
得遂引疾歸明年起南京右都御史辭不拜石三畏劾爲東
林領袖遂削奪崇禎元年召拜左都御史振舉憲規約飭僚
吏臺中肅然與大學士韓爌李標錢龍錫刑部尙書喬允升
同定逆案明年京察忠賢餘黨汰幾盡溫體仁訐錢某以于

汴係錢某座主也并許之子汴亦發體仁欺罔狀不聽吏部
尙書王永光力薦故御史高捷史塏于汴惡其人久弗咨兩
人竟以部疏起官遂日夜謀傾于汴中書原抱奇劾熿及于
汴并及尙書孫居相侍郎程啟南府丞魏光緒目爲西黨以
五人籍山西也工部主事陸澄源復劾于汴朋奸六罪澄源
雖謫于汴卒謝事去及辭朝以敦大進規七年卒年七十七
贈太子太保于汴篤志正學操履粹白立朝正色不阿崇獎
名教著仰節堂集學者稱眞予先生

王之翰字維藩絳州人萬厯元年舉于鄉銓膚施知縣補棗
陽有爲之筮易林者不吉之翰笑曰孔僖不辭臨晉翰乃辭
棗陽乎稅監陳奉欲開青山礦之翰以顯陵近執不可奉誣
劾之翰聚衆并及襄陽通判邸宅推官棟如後之翰報僉事

馮應京書曰竊聞君有不達爲不明臣有不爭爲不忠翰雖去公在猶可藉手忠報天子翰死無所憾應京乃極言奉惡給事中田大益御史李以唐等又合疏爲之翰言卒命緹騎逮訊并逮應京及宅棟如尋釋之而之翰竟瘐死天啟初贈光祿寺少卿

楊夢熊字徵我聞喜人萬厯丁酉舉人授永清知縣課農桑循行阡陌民德之立祠以祀調大興時史可法應童子試首拔之衆譁以冒籍夢熊曰天子畿無內外天下人皆得試何爲冒籍力請於學院又冠多士後可法爲一代名臣升刑部主事歷員外郎延安知府長蘆鹽運使剔敝除奸卻羨卹商升分守關南道參政未任卒子爾休貢生爲人質實好施人稱克紹先德云

史記言河津人少時家貧賣盃自給尋至運城爲諸生所辱
歸始發憤讀書萬厯戊戌成進士知河南濟源縣濟源地故
饒又濱河民間樹藝無方蓬蒿翦然記言至視罪人輕重令
闢草萊自贖爲制田器教以菑畝法開永利洞水渠使得資
灌漑畝獲數十鍾家有蓋藏因建啟運書院陳詩書禮樂風
厲之濟源大治解組後濟源人建祠祀焉後河津人過其地
聞爲史公故里人皆環向問起居感嘆不絕

郭迎褒字光忠河津人萬厯丙午舉人官至昌平兵備道副
使致仕迎褒清介直朴守正不阿由隴西縣考選刑部審錄
江南多平反著卹刑穉厯隴右東牟皆有生祠去思碑解組
歸行李蕭然邑人服其品

王國相字調宇聞喜人宗舜從孫萬厯壬子舉人授廣平通

判升全州知州以清正著聞居鄉平易凡地方公事必極言之南山孫起秀作亂練鄉勇同諸生李振城平之鄉人佩德卽其地立祠祀焉

李倅聞喜人萬厯四十三年爲刑部郎中諸司會鞠擬擊案張差語涉潛謀郎中胡士相等相顧不敢錄倅力爭乃得入獄詞遂爲鄭氏黨所惡遷鳳翔知府後復中以京察卒於家天啟初贈光祿少卿

龐尙廉字國維河津人萬厯丙辰進士授內黃知縣仁愛廉明一時十一屬重獄無不願質成者邑人爲立生祠拜河南道御史秉正觸邪不避權貴以不附魏闈轉河南僉事遂引疾告休

葉震生號梅塢聞喜人父士敦平涼知府積學博聞善古文

震生資稟聰穎氣貌魁傑性剛正不苟登萬厯己未禮經魁二甲進士授兵部主事從總督王象乾贊畫九邊多謀略有邊功升密雲兵備副使忤瑞歸里後起補洮岷道轉靖邊政聲藉甚卒於官

以上萬厯年

左應選字六語榆次人天啟辛酉舉人授昌黎令崇禎三年大兵破永平移師攻之應選保孤城悉力守禦四十餘日城賴以全以功擢薊州僉事時宜興當國以枉法事屬應選應選不爲屈宜興銜之嗾以他事遂被逮謫汾州

張鯤化字襄海太平人天啟壬戌進士寶雜知縣調整屋值巨寇犯境躬冒矢石立誠十賊搆兵部主事巡視九門存恤軍士升揚州知府正己率屬有政聲選關西副使設法彌盜地方安堵祀名宦

王裕心字元涵孝義人刑部主事政之子天啟壬戌進士官
南京國子監博士疏訟楊漣寃陳魏忠賢罪惡狀留中不報
轉戶部郎歷大名甯夏蘭州榆林道俱有政績擢右僉都御
史巡撫西安數立軍功致仕歸值李自成之亂不食死

李開先汾陽人天啟丁卯舉人有善行鄉人多德之祀鄉賢
孟兆祥字允吉澤州人僑交河少舉於鄉九赴會試天啟二
年始擢第除大理左評事崇禎初遷吏部稽勳主事歷文選
員外郎同生謁選請善地兆祥正色拒之其人悚然退進稽
勳郎中歷考功忤權要貶行人司副稍遷光祿丞進少卿歷
左通政太僕卿旋進通政使拜刑部右侍郎賊薄都城兆祥
分守正陽門襄城伯李國楨統京營軍稽月餉不予士無固
志城陷兆祥曰社稷已覆吾將安之自經於門下長子章明

字綱宜甫成進士兆祥揮之曰我死汝可去對曰君父大節也君亡父死我何生爲乃投繯於父之側兆祥妻呂章明妻王相向哭既而曰彼父子死忠矣我二人獨不能死乎皆自縊兆祥贈刑部尙書諡忠貞章明河南道御史諡節愍

國朝賜兆祥諡忠靖章明貞孝

皇朝通志兆祥諡忠愍章明諡忠信與明史異

白所蘊陽城人天啟間貢溫淳謹飭孝友性成授崞縣訓導未幾致仕居里卹貧周急三郤間咸倚毗之會軍興旁午多所編佐王申寇氛方息有被掠難婦不能歸者爲給貲斧送還大司農張慎言嘗曰衛司馬之服官白劄訓之居鄉砥行彌節真後進模楷卒年七十有二

李柄大同人天啟壬戌進士授中書選御史巡節慎庫一塵不染條上諸邊務稱旨出巡浙修海隄禦海寇爲永賴計差

滿贖金籍於官上將遣內臣出鎮力諫止之繼巡雲南卒於官中外悼惜焉

張三謨平定人天啟壬戌進士累官大理寺卿三謨篤孝廬墓三年歷官有能聲在大理輕重出入雖臨以威不少動彈劾權貴挾摘隱微而顯設之情狀具見或譏張爲幻亦口噤目張不能出一語廷推入閤爲忌者排陷不果後致政里居闖賊至聘爲相以死拒之尋聞明亡以鬱成疾卒三謨初官御史出按福建時當崇禎改元之初其辭闕疏有曰治亂大關在輔臣臺諫各得其職若輔臣化其成心臺諫不爲異論於治何有尤推一時篤論

王國楠安邑人天啟丁卯舉人官至監察御史四歲亡父事孀母侍膳問寢終身如一日兩任殘邑創立軹城泄臺中出

巡江南沿海肅清

任贊化字參之聞喜人天啟壬戌進士授直隸棗陽知縣調景陵秩滿擢貴州道監察御史論楊維垣反覆不忠已復論溫體仁蔽賢攘位忤莊烈帝召輔臣及五府六部官庭鞫之贊化持議侃侃又與體仁奏辨數四有旨降二級調外用補河南布政使都事後起禮部主事遷河南督學副使陝西關南道參政卒於官

溫素知字忠赤聞喜人天啟間恩貢沈毅有氣節幼慕蘇長公書畫皆臻其妙崇禎初授華陰知縣邑衝疲極力撫循舉行鄉約革徵收宿弊除里役司支擒治礦賊渠魁撫卹戍孤嚴禁左右不令出縣門遇事傳以木阜會中官入關中所過州縣皆蒲伏郊外素知曰吾不能屈膝聞人探其將至以踏

荒避村落間竟不面調邵陽值歲荒停徵歛止訟獄縣北山接澄城界盜賊盤據密授方略殲其魁餘解散時三春不雨流賊臨境率民登陴七晝夜不遑寢食以勞瘁卒於官士民爲治喪已復製主相與迎祀城隍廟

張斗星字奎垣大甯人天啟丁卯舉人授潛山知縣經寇殘破斗星悉心撫字方獲安堵諸生四人以仇誣視其巾斗星爲辯復寇餘難婦若干人俱遣還家會踏災傷值一危證人多不敢渡名曰試心橋斗星平步徑過少無怖容爲口占一絕有曰自檢胷中無別物試心橋上獨徘徊以上天啟年

戴運昌祁縣人布政光啟子少績學年四十九始領鄉薦又十年登崇禎辛未進士初知河南尉氏縣清廉慈惠折獄以情邑有亡命聚徒數千人將爲亂運昌擒其魁斬之調良鄉

縣入爲戶部員外郎練備彈力國計旋以陳演牽連下獄後入鹿臺山中閱二十年卒

郭衛宸字葵一太平人崇禎辛未進士授四川嘉定知州革除火耗有命案卽刻親驗誠格水火威清奸盜邊境以甯疏錢局創義倉立課社民爲建生祠十餘所升戶部員外以親老未仕歸里後凡事關地方者力爲之嘗揭報司農冀求減賦具呈銓部懇求賢令守城救荒鄉閭被德有司疏薦不起年七十一卒

張克儉字禹型屯留人崇禎四年進士授輝縣知縣六年春賊犯輝縣乘城固守賊不能下久之遷兵部主事被薦召對稱旨十二年擢湖廣僉事監鄭襄諸軍楊嗣昌鎮襄陽命爲守禦備深倚仗之明年春命安輯降盜克儉上書嗣昌言襄

陽自古要區今筦鑰獻陵視昔尤重近兩河饑民雲集新舊
降丁逼處其間一夫叫呼卽足致亂况秦兵以長武之變西
歸鄜房軍府初立降營基置奚啻放虎自衛紫漢西興初無
重門之備何恃而不恐嗣昌不以爲意報曰昔高仁厚六日
降賊百萬迄擒阡能監軍何怯耶及嗣昌入蜀委以留移錄
破賊功加右參議監軍如故未幾以本官移守下川南道鄖
陽巡撫袁繼咸奏留之十四年二月擢右僉都御史巡撫河
南未間命獻忠假督府軍符誑入襄陽城克儉倉皇奔救襄
府爲賊所執大罵死

馮調鸞平順人崇禎間貢任石城知縣時流氛橫熾調鸞修
增城垣團練鄉勇守禦有方地方乂安升懷慶通判民爲建

祠立碑

胡遇春字統三汾陽人少孤家貧登崇禎戊辰進士知聊城縣詢縣中利病知其最苦者歲報大戶充徵解水陸道舳舻絡繹破編民產十八九遇春乃建議設吏代之以贖銀倚器用諸有賄累則出於官而供張亦咸辦王申河大浸遇春左右指畫疏洩之必退而後已水既退艱播種復請免額稅未幾權知臨清州值孔有德兵屯州境遇春率州兵以守時出不備襲擊敵始逸大學士朱延禧聊城人也有僕奴犯陰罪匿相府遇春必捕之正以法指揮德州滿某狎一倡婦窺倡多金盜攫去倡恚死倡弟訟之滿賂當道屬誣倡弟坐死遇春爲直之曰不以賤抑其冤其戒子書曰汝父半生半死人斷不作貪墨吏爲若輩牛馬切勿學豪華兒姘鄉閭敗吾志蒞政六年擢戶部主事以病歸抱病五六年卒於家子庭宇

季子李自成之亂庭遂與弟同並隱居講學庭於易詩春秋
論語大學中庸孟子皆有論著同精明醫學四川總督某請
治篤疾至則愈且敬其爲人遂深交屬員有以三千金致饋
求同一言者峻拒之兄弟共勵名節有學守

劉三元字聚奎平遙人崇禎庚午舉人性方嚴負節概初知
樂城縣教民稼穡無曠土無惰民尋升兵部車駕司主事
兼戶部事出爲甯遠道會闖賊之亂三元慷慨飲泣與諸生
范羽可等糾集各路義師衆至數十萬及事無可爲遂棄家
爲黃冠放浪山水間後遊樂城舊治士民張樂伐鼓方於生
祠爲賽會三元徑入祠踞坐取爵暢飲衆環視之始識爲前
令尹也羅拜痛哭留止祠中晨夕事之如父母後卒於樂城
曹良直字古遺汾陽人崇禎丁丑進士知尉氏縣歷知靈壽

雄縣擢兵科給事中條奏兵形八事曰軍令不可輕更曰闕外不許請旨曰入援不許請旨曰援兵不許報號曰監軍不許敘功曰監軍不許鈔將帥之塘報曰戰守之功不宜并敘曰舉將運坐之法宜有分別良直少甚貧族入中有欲助之資爲治生計者謝曰吾輩豈逐末營利耶及歷三縣所至有政聲去之日民泣送者盈道性嫉惡在朝彈劾不避權貴以直聲著卒於官

衛廷憲字扶區陽城人尚書一鳳子崇禎丁丑進士授戶部主事惟崇文值歲祲商賈不時乃嚴稽痛革潔已從事遠近歡舞朝以其清特免稅額二萬賈爲曠典晉郎中出守淮安加意振刷罔畏強禦部臺旗鼓不避道繩之以法部臺頗不憚旣廉其清介狀喜曰吾知非能爲滌衷必不能爲強項益

欽重之以勞瘁卒於官

曹文詔大同人勇毅有智略從軍遼左歷事熊廷弼孫承宗積功至遊擊崇禎二年冬從袁宗煥入衛三年二月總理馬世龍界所賜尙方劍令率參將都司等伏玉田枯樹洪橋慶戰有功遷參將又從世龍有大安城鮎關之役加都督僉事七月擢延綏東路副總兵四年四月克河曲城追斬王嘉允以功擢臨洮總兵官獲點燈子西旋馘李老柴及其黨一條龍又分勦綏德宜君清澗米脂賊戰懷甯川黑泉峪綿湖峪封家溝皆大捷埽地王授首又從鄜州間道與總兵楊嘉謨副將王性善合軍五年三月大戰西濠斬首千級生擒杜三楊老柴餘黨攻莊浪走高山遊擊曹變蛟等謀而上賊潰走變蛟者文詔從子也追擊屢敗之賊逸出清水文詔縱反間

給其黨殺紅軍友遂蹙敗之水落城追至靜甯州變蛟先登唐毛山殄其衆可天飛劉道江遂圍合水文詔往救賊匿精銳以千騎逆戰誘抵南原伏大起城上人言曹將軍已沒文詔持矛左右突匹馬祭萬衆中諸軍望見夾擊賊大敗偃尸蔽野餘走銅川橋文詔率變蛟等追及之大戰陷陣賊復大敗尋會破賊甘泉之虎咒凹餘賊分竄追擊之隴州平鳳間十月三戰三敗之遂蹙賊耀州錐子山其黨殺獨行狼郝臨菴以降關中巨寇略平巡撫范復粹彙奏首功三萬六千六百有奇文詔功第一巡按吳銜推獎尤甚兵部抑其功卒不敘時賊見陝兵盛多流入山西御史張宸極請勅令入晉協勦於是命陝西山西諸將竝受節制六年斬混世王五臺孟定襄壽陽賊盡平太原賊幾盡又屢敗之澤沁遼潞間山西

賊乃避文詔鋒多流入河北命移師往討遂率五營軍夜襲
破賊於林縣七月大敗懷慶賊賊其魁潑地龍又追斬老回
回於濟源而四川石柱土官馬鳳儀軍敗沒侯家莊賴文詔
馳退賊河南巡按反劾之部議文詔怙勝而驕乃調之大同
七年七月駐懷仁八月移駐鎮城十一月偕制撫竝充軍邊
衛山西巡撫吳牲請用之晉中乃命爲援勦總兵官八年三
月八省總督閻文詔整兵南大喜卽令擊賊隨州文詔追斬
賊三百八十有奇四月令由闕鄉取山路至商雒拊其背而
遣之文詔躍馬去五月五日抵商州賊去城三十里營火滿
山文詔夜半率從子參將變蛟守備鼎蛟都司白廣恩等敗
賊深林中追至金嶺川賊據險以千騎逆戰變蛟大呼陷陣
諸軍竝進賊敗走變蛟勇冠三軍賊中聞大小曹將軍名皆

上巳到三夕一三三一 勇軍金一六
五三
怖懼已而自漢中馳赴靜甯秦安清水秦州間賊衆且二十萬文詔所部合張全昌張外嘉軍止六千六月前鋒中軍劉宏烈被執俄副將艾萬年柳國鎮復戰死文詔聞之瞋目大罵亟詣總督請行總督喜而無兵可策應文詔乃以三千人自甯州進遇賊真甯之湫頭鎮變蛟先登斬首五百追三十里文詔率步兵繼之賊伏數萬騎合圍矢蝟集有小卒縛急大呼曰將軍救我賊中叛卒識之甚賊曰此曹總兵也賊喜圍益急文詔左右跳盪手擊殺數十人轉鬪數里力不支拔刀自刎死遊擊平安以下死者二十餘人總督聞拊膺大哭上亦痛悼贈太子太保左都督賜祭葬世蔭指揮僉事有司建祠春秋致祭

國朝賜諡忠果

曹變蛟大同人文詔從子也幼從文詔以功厯官遊擊崇禎四年從復河曲五年連破紅軍友等於張麻村隴安水落城毛唐山又破劉道江等於銅川橋勇冠諸軍御史吳牲薦爲參將文詔移山西從戰輒勝文詔改鎮大同山西巡撫許鼎臣言晉賊紫金梁雖死老回回過天星大天王蝎子塊闖塌天諸渠未滅變蛟驍勇絕人麾下建兒千百才乃文詔亞乞留晉中從之七年南征湖廣賊又北援文詔於大同冬文詔謫戍亦以疾歸八年文詔起討陝西賊變蛟以故官從大捷金嶺川磨湫頭鎮皆爲軍鋒文詔歿收潰卒復成一軍總督洪承疇薦爲副總兵置麾下破賊關山鎮追奔三十餘里又追闖王高迎祥戰鳳翔官亭斬七百餘級尋擊敗迎祥於乾州迎祥中矢走斬三百五十餘級已而迎祥夜出朱陽關賴

變蛟陷陣軍獲全九年破閩將澄城邊至靖虜衛轉戰安定
會甯抵靜甯固甯賊屢挫秋擊敗混天星於蒲城賊西走復
追破之十年二月巡撫孫傳庭部卒許忠勾賊變蛟聞亂返
賊遂遁四月賊入洮岷階文山諸將力戰郭家壩賊死傷無
算九月擢都督僉事為臨洮總兵官降小紅狼十月賊入蜀
從總督由沔縣抵廣元賊已復還軍邀擊斬五百餘級十
一年四月以滅賊踰期鑄五官戴罪辦賊追闖將李自成於
番地斬六千七百級有奇轉戰千餘里不解甲者二十七晝
夜賊止餘男婦三千潰入塞還勦之賊敗入山不敢出六月
扼六隊賊於秦州自成六隊等將還走階文及西鄉憚變蛟
六隊祁總管皆降惟自成東遁變蛟窮追而設三覆於潼關
南原追及大呼斫賊賊奔入伏中大敗死者相枕藉村民用

大棒擊逃者自成妻女盡失僅從七人竄餘皆降時關中賊
盡平錄功封左都督十一月從入觴十一年留屯遵化陝督
鄭崇儉請變蛟軍西還不許旋用爲東協總兵官十四年三
月出關營松山北乳峰山旋急入松山固守十五年二月殉
城贈榮祿大夫太子少保世蔭錦衣指揮僉事

國朝賜諡忠烈

傅應鳳字菊菴山陰人舉人崇禎九年由內鄉調澄城寬猛
合宜遇土雍雍有禮十三年饑民倡亂振贍勸貸勦撫得法
升淮安府同知

李化龍榆社人弱冠登崇禎戊辰進士授中書舍人歷湖廣
道御史升戶科給事中上疏彈時宰及當道者名動京師有
鐵面小李之謠然與詹爾選皆以一鳴輒斥不久於其位識

者惜焉明紀編罕記其事

山西通志卷一百三十一 經籍金十六

五

辛全字復元少稱神童方總角講河圖洛書輒能驚其長老
弱冠從塾師卽有志聖賢之學每讀程朱書焚香端坐錄其
言行以爲法則一時有辛夫子之稱尋奉安邑曹子真爲師
學益進吳相國旌倪祭酒元路御史振飛等推挽恐後崇
禎間膺貢入京師相國賀逢聖特疏薦之詔以知府用全亦
欲舉素所論著見詣行事未幾以內艱歸還膺疾卒全早喪
父哀毀如禮事母愛敬兼至奉伯兄備極愉和安貧樂道終
其身旣沒門人私謚曰文敬著有學庸說經世頌畫等書
成德字元升霍州人依舅氏占籍懷柔崇禎四年進士除滋
陽知縣性剛介清操絕俗疾惡如仇文震孟入都德郊迎執
弟子禮語刺溫體仁體仁聞而恨之兗州知府增餉額德固

爭又捕治其爪牙知府怒譏於御史禹好善好善體仁客也
誣德貪虐逮入京滋陽民詣闕訟寃具疏極論體仁罪德母
張伺體仁長安街繞輿大罵拾瓦礫擲之體仁恚疏聞於朝
詔移德鎮撫司獄掠治杖六十午門外戍邊坐贓六千有奇
德居戍所七年御史詹兆恆薦起如臬知縣諱擢武庫主事
以母老辭不允乃就道至則上言請褒揚仗節死義之臣未
幾城破不知帝所在趨至午門見兵部尙書張縉彥自賊所
出德以頭觸縉彥胸且誓之俄聞帝崩持雞酒奔東華門奠
梓宮於茶棚之下觸地流血賊露刀脅之不爲動莫畢歸家
有妹年二十餘未嫁德顧之曰我死汝何依妹曰兄死妹請
前德稱善哭而視其縊入別其母哭盡哀出而自縊母見子
女皆死亦投縊死先是懷柔城破德父文桂遇害家屬盡沒

妻劉在京以徵德賊急憂悸死至是又闔門死難惟幼子先
寄友人家獲存贈德光祿卿諡忠毅

國朝賜諡介愍

以上崇禎年

右明萬厯至崇禎一百九人